

lere, & ne similes introducantur in futurum providere desiderans, hæc perpetuo permansurâ constitutione decernit, ut Capituli sigillum in capsâ sub tribus clavibus, unâ quidem penes Decanum, vel ejus loco Præsidentem, alterâ penes Doctoralis Præbendæ Canonicum, vel eo non existente, Capitularem à majori parte Capituli nominandum, tertiâ verò penes Secretarium servandis, custodiatur: eisdem nihilominus prædictis clavium custodibus debitæ officium fidelitatis injungens, ut nullas cujusvis generis litteras, præter illas, quæ à pleno Capitulo deliberatæ fuerint, eodem sigillo sigillari permittant.

## §. II.

**E**T, ut dilucidâ rerum Capitularium ratio suo tempore, & quoties quæsita fuerit, commodius reddatur, præcipit eadem Synodus, ut præter alios libros Capitulo pro tempore necessarios, certus aliquis, ad annotandum commissiones, legationes, deputationesque omnes, ab eodem Capitulo factas, liber habeatur, qui Secretario custodiendus, unâ cum reliquis scripturis, & actis per inventarium consignetur, ut illum, & illa, quoties requisitus fuerit, exhibeat.

## STATUTORUM

## PARS TERTIA.

## CAPUT I.

*De iis, quæ reddituum Decimalium Administratores agere debent.*

## §. I.

**C**Upiens aliàs summopere hæc Sancta Synodus felici reddituum Ecclesiasticorum administrationi, utilitati, & incremento prospicere, & laudabilem Hispanicarum ecclesiarum consuetudinem Cathedralibus hujus Provinciæ ecclesiis, in hoc potissimum sequendam proponere; statuit, & mandat, ut duo Præbendati, (Dignitas videlicet, & Canonicus,) vel alii duo Capitulares, huic ministerio aptiores, à Capitulo, assignatâ congruâ juxta reddituum quantitatem mercede, deputentur: qui unâ cum eo, quem Prælatus negotiis quidem idoneum, & in promovendis redditibus exercitatum ad id nominaverit, decimales hujus Archiepiscopatus, & Provinciæ redditus annis singulis auctionentur; ita ut admittendis auctionum sponsonibus, ac deliberandis eorundem reddituum locationibus intersint, necessariasque, ac sufficientes cautiones recipiant.

Ex statutis Compostel. c. 79. & 80. & ex Consuetâ Granat. c. 60. in §. (baca las rentas decimales) & §. (las posesiones)

## §. II.

**E**Idem etiam Capitulo hæc ipsa Synodus iungit, ut viros aliquos deligat, qui Ecclesie fundos, prædia, domos, redditus, & quæcumque alia bona stabilia quotannis visitent; illorumque omnium statum, dispositionem, discrimen, & indigentiam eidem Capitulo fideliter exponant. Quibus eadem Synodus conscientiam graviter onerat, nisi quibusvis amore, odio, ac humano lucro postpositis, Ecclesie utilitati, ac debito suæ visitationis muneri responderint.

## CAPUT II.

## De Œconomis.

## §. I.

**U**T autem Ecclesiasticorum bonorum securitati, & indemnitati consulat hæc Sancta Mexicana Synodus, ordinat, & mandat, ut Œconomi à Prælato, & Capitulo nominandi, sint in Christianâ religione, & conscientie rectitudine laudabiles, legales, sinceri, & communiter approbati; nec prius admittantur, quam idoneas, attentâ bonorum eis consignandorum quantitate, cautiones præstiterint, ac unâ cum fidejussoribus hujusmodi se in eujuslibet anni fine, si præscriptum solutionum, reddituumque, ac fundorum tempus id permiserit, vel ad summum secundo anno peracto; dum tamen interim ipsorum œconomiâ durat; integram de dispensatis rationem, & satisfactionem reddituros, sub obligatione promiserint.

Ex statut. Compostel. c. 80 & 81.

## CAPUT III.

## De Fabricæ bonis.

## §. I.

**Q**UA stabilium bonorum permanentia frequenti, & opportuna visitatione maxime indiget, ex hujus Mexicanæ Synodi Decreto ordinatur, atque præcipitur, ut deinceps fabricæ Œconomus sufficientem exigendorum, exactorumque bonorum, & expensarum rationem petenti Capitulo reddat. Domus quoque, ac fundi ejusdem fabricæ diligenter inspiciantur, ac de illarum, illorumque augmento, & conditionum in eorumdem locationibus appositarum impletione, censuum quoque, & emphyteusium duratione: de ipsius denique fabricæ utilitate, & proventu perquiratur: & quæcumque super præmissis scripturæ, acta, & instrumenta fuerint, apud archivium, eadem statuente Synodo, deputandum, sub numero, & specificatione reponantur.

Ex statut. Compostel. c. 78.

Lib. 3. titul. de rebus Eccl. &c. §. 6.

## CAPUT IV.

## De Anniversariis, &amp; Commemorationibus.

## §. I.

**U**T defunctorum legata, commemoraciones videlicet, & anniversaria, ultimarumque voluntatum dispositiones in Cathedralibus eccle-

Dict. tit. de rebus Eccl. §. 3.

Lib. 3. tit. 7. 9.  
& 10.

siis fundata, & in futurum fundanda debitam executionem, & conservationem habeant; hæc Sancta Synodus in præmissis omnibus, & eorum singulis illa servare, & executioni mandare constituit, quæ eadem decernente Synodo, in titulo *De Testamentis, Institutionibus, Jure Patronatus, Sepulchris*, &c. statuta, & ordinata sunt: pro quorum complemento, is, cui chori tabulam quolibet hebdomadâ ordinare incumbit, anniversaria, & Missarum officia hujusmodi, per Capituli Secretarium quoties celebrari debent, referenda, in eadem tabulâ notare teneatur, quatenus omnes incumbentiæ sibi munera noscant, & exequantur.

#### CAPUT V.

##### *De Scripturis Ecclesiæ, & earum custodia.*

Cone. Milan. 3.  
verbo quocumque  
cum seq.

Lib. 3 tit. 8. n.  
4. & 7.

**P**rælatorum, Capitulumque curæ incumbit, universa Ecclesiæ bona, illorumque jura, scripturas, & instrumenta servare; ideo hæc Mexicana Synodus omnibus Capitulis injungit, & mandat, ut ea in scripturarum sub inventario exprimendarum custodiâ, & archivii, à quo nihil sine Prælati licentiâ extrahatur, deputatione, & clausurâ observent, & exequantur, quæ eadem Synodo ordinante, in titulo *De rebus Ecclesiæ conservandis, vel non alienandis*, sub pœnis in eis contentis, decreta reperiuntur. Quando autem Prælati, & Capitulum, quibus in hoc conscientia

oneratur, aliquorum hujusmodi bonorum alienationem, in evidentem fabricæ utilitatem cedere judicaverint, tunc, nisi cetera omnia necessaria, & requisita, tam per Jus commune, quam per Apostolicas litteras disposita, & ordinata, præcesserint, nihil innovetur. Si quid verò aliter factum fuerit, nullitatis vitio subjaceat.

#### CAPUT VI.

##### *De Candelis in die Purificationis Beate Mariæ distribuendis.*

#### §. I.

**I**n Candelarum distributione die Purificationis Beate Mariæ faciendâ, prohibet eadem Synodus vanos, ac superfluos cereorum sumptus in posterum fieri. Præcipiens nihilominus honestam ceræ quantitatem Prælato, Capitularibus, & omnibus Ecclesiæ ministris, atque servientibus necessariam provideri, eamque ipsius Ecclesiæ Thesaurario, cui simul cum Præsidente ejusdem ceræ partitio incumbit, consignari. Omnes quoque sollemni ejusdem festivitatis processioni interventuros, quibus in hoc conscientiam onerat, hortatur in Domino, ut singuli cereis accensis cum devotionis fervore, & spiritus elevatione, quæ & ipsorum statum, & illum actum deceat, procedant,

Concil. Mil. 3.  
Verb. quod pietatis,  
& 5. tit. quæ ad  
Sacramentalis,  
& Sacramenta generatim  
pertinent.

## CAPUT VII.

*De Requite, ejusque usu, ac tempore.*

## §. I.

Ex consueta  
Granat. c. 55.

Sess. 24. c. 12.  
Verbo *pastores*  
*obtinendis.*

Lib. 3. tit. de  
*Clericis non resi-*  
*dentibus*, §. 2.

Ubi *supra* dict.  
§. 2.

Quamvis præmissæ erectionis forma Cathedralium hujus Archiepiscopatus, & Provinciae ecclesiarum Capitularibus, qui præter quotidianas distributiones nullos omnino fructus habent, aliquod pro requie tempus non assignet; & Sancta Synodus Tridentina, dum quibusvis ecclesiarum hujusmodi Præbendatis ultra tres menses ab eisdem ecclesiis quolibet anno abesse prohibet, earum ecclesiarum constitutiones, quæ longius servitii tempus requirunt, intactas relinquat: hoc tamen Sanctum Provinciale Concilium humanæ infirmitati aliquo, ut par est, indulgentiæ præsidio subvenire volens, quò suavior, atque ferventior divinorum officiorum celebratio fiat, singulis omnium Cathedralium ecclesiarum hujus Provinciae Præbendatis septuaginta dierum requiem quolibet anno concedit, quemadmodum in titulo *De Clericis non residentibus*, inviolabiliter observandâ sanctione decrevit. Ad decidendum verò quascumque super hujus decreti, & concessionis usu dubitationes pro tempore occurrentes, quæ judicis ministerio indiguerint, idem Provinciale Concilium plenam cuilibet in sua Diocesi Prælato facultatem, & auctoritatem tribuit, ut attentis temporis, personarum, negotiorumque circumstantiis, & habitâ tenuitatis reddituum, ac

debitæ divinis officiis frequentiæ ratione, quæ Dei, ac Domini nostri obsequio, Divinique cultûs augmento potissimum convenire judicaverit, ea deliberet, ordinet, atque provideat, prout Pastoralis ejus prudentiæ, & sollicitudini idem Concilium committit, & conscientiæ relinquit.

## §. II.

Declarat tamen eadem Mexicana Synodus neminem præmissi decreti, & indulti vigore à suâ Ecclesiâ abesse posse in aliquo ex infrascriptis diebus, qui sunt:

Tres priores Paschales dies.

Nativitatis Domini.

Resurrectionis.

Pentecostes.

Circumcisio

Epiphania } DOMINI.

Ascensio }

Conceptio

Nativitas

Annuntiatio } B. MARIE.

Purificatio

Assumptio }

FESTUM { Sanctissimæ Trinitatis.  
Corporis Christi.

Feria quarta, quinta, sexta, & Sabbatum majoris hebdomadæ.

Sancti Josephi.  
 Sancti Joannis Baptistæ.  
 Sanctorum Petri, & Pauli.  
 Omnium Sanctorum.  
**FESTUM** } Commemoratio Defunctorum usque  
 ad finem Missæ.  
 Patroni Generalis.  
 Patroni Titularis Ecclesiæ.

Omnes item Dominicæ Adventûs, & cujusvis mensis tertiæ, quandiû Sanctissimæ Eucharistiæ processio duraverit: omnes item dies Quadragesimæ.

## §. III.

**S**imiliter hæc Synodus neminem septuaginta horum dierum requie, nisi pro ratâ temporis, quo eidem ecclesiæ inservierit, gaudere posse declarat. Siquis verò, dum actuali unius Præbendæ residentiæ integrè inservit, ad aliam in eadem ecclesiâ promoveatur, suâ (ut par est) requie integrè gaudeat.

## §. IV.

**I**nsuper eadem Mexicana Synodus declarando subjungit, ut ad matutinum præcipuarum festivitatum superius expressarum (nedum præter Adventûs, Quadragesimæ, ac tertias cujusque mensis Dominicæ) Præbendati omnes interesse teneantur. Qui verò, nisi ex veræ ægritudinis impedimento, defuerit, præter illius horæ distributionem, sex etiam dierum statim in quadranti annorundem emolumentis irremissibiliter mulctetur;

ita ut qui hanc pœnam quovis modo remiserit, eandem emolumentorum quantitatem fabricæ, ipso jure absque ullâ aliâ declaratione in conscientia restituere debeat, juxta alias factam ab hæc Sanctâ Synodo dispositionem.

Ubi suprâ lib. 3.  
 titul. de Clericis  
 non residentibus  
 §. 2.

## CAPUT VIII.

*De iis, quæ amittit, qui prædicta requie utitur.*

**R**ationi consentaneum est, ut propriæ voluptatis, quietisque corporeæ oblitis, majus lucrum respondeat, quàm eis, qui recreationi vacant. Idcirco hæc Sancta Synodus Mexicana plurimum dubitationum, absurdorumque causas succidere cupiens, decernit, & mandat, ut quandiû aliquis Præbendatus prædictâ requie usus fuerit, interessentiis, obventionibus, funeribus, anniversariis, & manualibus, quæ non nisi verè, & corporaliter præsentibus, & residentibus dentur, absentiumque multâ, careat. Itaque dum in quadranti signum hoc R. requiem denotans habuerit, Præbendæ suæ acervo, seu grossâ dumtaxat fruatur. Ut autem quisque Capitularis certum remanentium sibi de hujusmodi requie dierum numerum facillè teneat, ex ejusdem Synodi mandato Punctator in quadrantis margine, quos quisque de hujusmodi requie dies perceperit, adnotare teneatur.

## CAPUT IX.

*De iis, quæ lucrari possunt Præbendati, qui à Prælato occupantur.*

## §. I.

In c. de cetero, in c. ad audientiam de Clericis non residentibus.

Concil. Trid. Sess. 24. c. 12. de refor. verbo omnes vero.

Concil. Milansen. 4. verbo Episcopo.

**C**UM quilibet Prælatus duos Præbendatos curæ suæ Pastoralis subsidium deligere, & occupare Pontificio jure possit; hæc Mexicanâ declarante Synodo statuitur, & ordinatur, duos Capitulares hujusmodi à Prælato ad effectum prædictum nominandos, annuis suarum præbendarum emolumentis (præterquam obventionibus, & manualibus, quæ non, nisi verè, & realiter assistentibus, ut præfertur, dantur) integrè gaudere posse. Ita ut in celebrioribus festivitatis præmissis, ad matutinum, & alias horas, nisi tunc justo actualis occupationis impedimento caruerint, super quo eorum conscientia oneratur, interesse non debeant.

## §. II.

**Q**Uicumque præterea Præbendati, qui Prælato alicubi extra suam ecclesiam Pontificaliter celebranti ministraverint, vel quos idem Prælatus à chori ingressu, vel ab eodem choro, etiam ante Missæ, vel alterius horæ finem ad se vocaverit, perindè ac si verè, & realiter Divinis interessent, universa emolumenta lucentur. Qui etiam ipso Prælato mandante concionem in eadem Cathedrali ecclesiâ habiturus fuerit, tri-

bus ante concionem diebus, si tamen in illis ad Missam, & vespas interfuerit, eorundem trium dierum obventionibus, & manualibus, sicut alii verè præsentès, gaudeat; si autem alibi sine expressâ ipsius Prælati jussione verbum Dei prædicare voluerit, nullis hujusmodi interessentiis, sed concessis pro requie diebus, si quos habuerit fruatur.

## §. III.

**N**E autem cuiquam egrediendi chorum simulata suffragetur occasio; sed omnes coram Deo in sinceritate cordis ambulare studeant; hæc Sancta Synodus illorum, qui per fraudem aliquid lucrati fuerint, conscientias ad illud ipsum restituendum, ipso jure teneri, declarat.

## STATUTORUM

## PARS QUARTA.

## CAPUT I.

*De patitur Præbendatis ægrotantibus concessio.*

## §. I.

**P**Ræbendatos adversâ valetudine laborantes favore per Sacros canones concessio prosequi volens hæc Sancta Synodus, decernit, & man-